

卷施閣集

冊四

卷之四

四

卷施閣文乙集卷第三

陽湖洪亮吉著

楚相孫叔敖廟碑

隆古以來吾知之矣高卑甫形君與民近天子猶一方之吏九重有
並耕之說沾體塗足日接于巍巍茅茨土階不隔于攘攘簞哉上乎
九紀以降五遷以前惠民之實事歸于元首乎由周以來亢鋸益密
閭闔九重黔首不能歷其一繁露十二圓顱不能瞻其秒又人列十
等國及數圻非夫實心之宰莫就小康之俗而循吏一傳權輿于司
馬春秋五人兆始于南郢則實惟楚相孫叔敖云相君期思之鄙夫
荆楚之下士推其登進之由投分之始則婉孌之一人膺薦賢之上
賞焉道由于莊王罷朝樊姬立侍牀第一語史臣書于廟策朝守三
歎尸臣易其常度人以謂南服之霸非君王之謂樊姬之力也吾以
謂令尹之進非虞邱之功掩袖之效也然相君本幼而神靈長而秀

羸殆庶隣于亞聖儀表出于齊俗有多能之稱稟無欲之性一日出見岐頭蛇殺而埋之啜其泣矣是將死矣其誰知之母也聖善庸何傷乎子有陰德是知一成而爲敦蛇邱以之著號兩首謂之枳妖德因而自戕及其相也四境咸喜一人獨弔相君降赤芾之尊聆白冠之語位益高而志下宦益大而心小同虎乳之三已凜狐邱之六言四牡戒其疾則利牝馬之貞一狐怯其溫方縫殺羊之轉利前害後悟主于蟬翼泉輕幣重利民于蟻鼻迨夫百事具舉精心爲政衡前于軌三年而不知輪庫于梱半歲而自易百金之珎無益而可碎三尺之喙不言而奚事又修僕區之法擇鬻熊之典舉荆尸之政紹封汝之規惟此文德益之武烈詩曰元戎十乘軍志曰先聲奪人盛矣哉勝則河雍之濱封武軍之尸敗則敖鄙之間食嬖人之肉霸業之定由勝算之先與至夫爲于一日利及千祀築芍陂濬陽泉淮南王書曰決期思之流以灌雩婁之野皇覽云激沮水之波以作雲夢之

澤後有知者楚南大澤之池誰其嗣之廬江萬戶之邑謹案祀典曰
法施于民勞以定國非是之謂乎夫其三仕三黜勤拳于當國十世
二世綢繆于家事固知尺帛之暖不逮于生前負薪之困將貽于身
後而存資相工之益沒餘伶人之助越襪荆鬼避一名于寢邱戾岡
妒谷環萬禩于封邑君子之澤非將斬于五世廉吏可爲行有奮于
百代焉廟蓋創于西京之初修于延熹之歲棟宇隳壞則感夢示之
兆輪奐聿新則遷秩酬其德迄二千年有舉莫廢知縣謝君慕潘國
之政紹魏郡之績方校輿地著士女之志遂覽勝蹟涉名賢之庭見
夫曠而不修憬焉而懼又以其地逼隘遂移先賢句子之祠祭于別
所增其式廓需以時日廟成乞爲文于石時予方助修縣志校勘圖
經陵谷未變長掖之碑已迷淮流方漲北隅之基宛在竊以爲旣食
其利必報其功連山之竹木相君之所植九罭之蕃隰小民之所利
平田納結則一畝浮于十鍾方舟下粟則數鄉濟于百縣昔云境垓

下濕今推沃饒上土惠此中國遺于孫子矣余感夫循良之首美利
之廣宣尼未生不及流遺愛之涕薦賈先隕無由識治民之效而使
東南之民日出而尸祝百世之下春祠而歌舞中興主相聞縣名而
動色末世嗣續入崇廡而頒胙則奉法舉職守死善道之吏均未得
及焉是以班固作史宰相入于良吏范氏紀載司空儕于牧守莫不
舉此成法譜彼風愛斯所謂知致治之體得核實之道矣則夫綰黃
綬乘墨車至祠下者流連乎堂戶留覽于豆俎遐哉渺焉蓋移風易
俗之事孰不由于此焉

八月十五泛舟白雲谿詩序

小雨忽晴秋花轉媚雲谿小閣月來沉沉錢唐郭生南巷呂子或攜
壺觴遠挈簫簫予與孫君買舟深港徑可十尺租才百錢王生居麀
疊市甘脆菱栗之屬粲已盈艇與二三子拍浮其中幃袖作帆折柳
代檣西經紅橋東阻北郭兩岸宿鳥一川遊魚隨波沸騰離樹上下

啾啾唧唧聲不得歇沿谿以北稍有竹樹下蔭密藻寬可彌畝黑白
萬羽浮沉千頭波喧葉飛悉萃其裏從洲以南檐瓦可數橋陰數尺
乃界中外孤簫一聲高樹答響呂生歌狂不覺離口樓閣半里鉤簾
一時兒童不眠應以拊掌歌韻欲寂盈觴勸酬欣羅狂譚樂說舊事
忽復相覩首已如沐吟肩旣冷零露可挹離離星辰方訝西暗川東
曉華驚見日出相與登岸因而賦詩里傳其狂朋訝爲逸嗟乎半世
之樂成于奉親百晝之娛奚若選夕奈何中歲各值多故星辰渝乎
昔約風雨破其奇裏顏非朱而潭鯉驚衣皆麻而林鳥訝此則攬盈
尺之照則逃影于閨聆入秋之聲而離樹却走也以少歲之遊畢于
此夕故振筆序之以貽數子亦以志不忘耳詩凡若干首時乾隆四
十一年丙申八月十五日越三歲己亥十月二十日序同游者爲錢
唐郭鎔同縣呂星垣孫星衍王育璇凡五人

適王氏亡姑權厝志銘

先君子同產七人其五爲適高氏亡姑歸縣學生其泰早卒者也姑
又次之年最幼與諸兄弟齒故行第七家人咸呼七姑云魯國嬌女
扶風幼妹生甫數月卽罹家屯時先王父追償大同城工核減帑項
臺符屢下折田券以輸官囊金已空鬻鳴琴而僦屋爰自雲谿里舊
第遷于中河橋賃舍脩脩予羽業鴟鴞之四章依依降桑均鴈鳩之
七子甑生塵而日宴風吹攄以歲寒然而歌詩甫半悟鹿食之相呼
魯論未終結鶉衣而不恥以儒風移其閨識者也乾隆十七年歸國
子監生王君汝桂琴瑟靜好松柏悅心樂羊廢讀則正容以悟之周
郁耽遊則流涕而私諫尊親嘉其有禮所天感其柔誠無何值歲元
枵傷夫奇疾文宣見兆知宏微之倏奄蔣侯示神識悅豫之不永截
髮夜禱則光暗北辰割肌晨饋則血溢衷袒靈場之鐙自燼虛牖之
幔驚開雖戟手爲厲尤避貞姬而搏膺之言親聞弱婢臨終誦詩而
逝未知其祥也嗟乎語怪之錄哲人所懲而無鬼之言阮生已屈同

稠三載侍疾七旬摩笄自刺則慈母驚啼對食不飧則君姑繞泣痛心誓殯掃跡居樓連廛而語不聞隣限室而影無踰闥蓋雖雅志竟違而已枯魂待斃者矣先王父憂之俾啓紗幔以授徒飾蒿簪而教讀童姬繞案便號經師幼姒入門咸稱弟子亮吉每以春秋暇日參訊起居念揚水而傷心勉遺孤于忠孝蓋一門兄子雅愛李膺兩世曠僚惟期沈正先是監生君父某三世未葬七棺在堂平原則哲孫屢殤信都則全家善病姑每以爲憂微而入諫某未之急也無何姑亦邁疾以卒烏乎哀哉松枝生室華屋廢爲山邱桃符貼窗餐廚減于藥竈鄭宗孝婦雖代尊章之愆潁川悖守將受亡靈之責姑生于雍正五年月日卒以乾隆四十四年七月九日守節二十五年年五十有二無子以翁命撫族子及異姓子各一人甥而襁舅不聞昔經子又生孫望之異日以監生君未葬故權厝于某所禮也積陰之氣旣驟損乎生人陳殯之居或不容於列匱重爲之銘曰

繫中閨之弱質兮夙降志于典墳既怡松而悅柏兮乃出室而字人
嗟三年之失儷兮羌廿載以酬身視雙棺之前後兮隨七殯而紛陳
厝塵之未可久兮亦聊以妥夫貞魂

與孫季逵書

季逵足下日來用力何似亮吉三千里外每有造述手未握管心縣
此人雖才分素定亦契慕有獨至也吾輩好尚既符嗜欲又寡幼不
隨搔頭弄姿顧影促步之客以求一時之憐長實思研精蓄神忘寢
與食以希一得之獲惟吾年差長憂患頻集坐此不逮足下耳然犬
馬之齒三十有四距強仕之日尚復六年上亦冀展尺寸之効竭志
力以報先人下庶幾弭竹帛之聲傳姓名以無慚生我每覽子桓之
論日月逝于上體貌衰于下忽然與萬物遷化及長沙所述佚遊荒
醉生無益于時死無聞于後是自棄也感此數語掩卷而悲并日而
學又傭力之暇餘晷尚富疎野之質本乏知交雞膠膠則隨暗影以

披衣燭就跋則攜素冊以到枕衣上落虱多而不嫌疑塵浮冠日以積寸非門外入刺巷側過車不知所處在京邑之內所居界公卿之間也夫人之知力有限今世之所謂名士或縣心于貴勢或役志于高名在人者未來在己者已失又或放情于博弈之趣畢命于花鳥之妍勞瘁既同歲月共盡若此皆巧者之失也間嘗自思使揚子雲移研經之術以媚世未必勝漢廷諸人而坐廢深沉之思韋宏嗣舍著史之長以事棊未必充吳國上選而并亡漸漬之效二子者專其所獨至而置其所不能爲足妒耳每以自慰亦惟敢告足下也

錢獻之注爾雅釋地四篇序

重光赤奮若元月吾友錢君獻之注爾疋釋地四篇畢時予方疏國語地名未竟病茅驄之莫定阻彤魚之乏證旁采金石搜稽或窮高觀周秦披覽亦徧聆遂得于許氏皋落證以韓生廣都之壠注乃增乎韋昭卑耳之谿名堪通于劉向以墮高之文識觸山之語誕由田

渭之蹟知惠寶之傳疑

國語共工氏墮高堙痺知列子淮南觸山折柱所由附會也又晉語爲惠公從子于渭濱

渭濱韓非子書作惠寶

茫茫一編窺古獨笑焉蓋六合云渺難從豎亥之步三

古甚遠誰詳伯翳所名而儒者好破舊聞矜其臆獲甚或變易陵阜移徙川澤此則超北溟之說非屬寓言移太行之語遂成左證也夫創奇者旣信心之已過守故者又目證而或離以數雜之居諸窮八埏之浩渺知其難矣又況高下定名肇于文命川數著錄仿自元公梁卜之所未言樊李于焉缺注卽云證之別簡而東陵未究先地昧于金蘭

漢地理志廬江郡金蘭西北有東陵鄉水經注廬江郡有金蘭縣按金蘭無所考二漢亦無此縣水經注縣字當有誤

橋山屢移遂神迷于劍舄而能采茲衆說成乎一是高平廣平皆區

方之可指朝陽夕陽非向背之虛號則前哲之所未及視景純而或過者焉時孫君季逵亦注山海經削諸迂怪之談證以耳目所及揖夷堅于上世諒厥用心友裴酈于六朝均茲命意蓋輿地之學至今日而言者益廣亦訂之益精也若夫日下之所在息慎之爲方此之

闕疑師夫前聖

適汪氏仲姊哀誄

乾隆四十六年七月十二日日在西隅亮吉客西安使院得舍弟京師報書知仲姊之喪質明爲位而哭烏乎哀哉天高不聞喪我哲舅伊惟哲昆閨闈之仁烏乎哀哉秋林隕風嘉實首墮高厓驚雷迅羽早落固知本傷者墮隕巢崩者卵毀而未墮之翼迷音于霧雨在林之柯甘志于搖落是可傷矣不有闡微曷云紀實烏乎哀哉姊諱蓀先府君次女也先是府君舉一女婉孌穎惠未期而殤府君哀銜于心朱識厥臂及姊生前志宛然固知一嚙之肌恩延乎再世盈掬之淚沉痛乎九地雖在甫生而孝德已種矣年及毀齒出就女師誦盤中之詩工九九之算先王父尤鍾愛焉年十一遭府君喪育于外家女兄弟十數人聯裾爭華簪首耀玉見姊工作爭走慰之姊曰是貧女職也夫奚以恥桃林披華靡追乎遊讌風雨如晦尤勤于夜織一

樓不遷十載于此焉一夕女兄弟十數人共坐室中比舍回祿延及寢室闔坐盡走不知其然姊獨却入室中扶外王母龔太孺人以起人以是異之伯姬待姆無下堂之嫌劉姜叩天獲反風之應誠孝之所格也年十五通論語毛詩蘋藻可掇無忘乎飲泉簞瓢亦怡陶陶乎婁空時伯姊已出室母舊多病一室之故姊實總之檐日杲杲曝先人之賜書樓風蕭蕭值嚴親之諱日聞趙女之哭哀感路人聆樂姬之論化及鄰媪從舅氏妻董安人名知人嘗目姊曰端敏之性必宜爾家柔仁之資亦儀其母爲中外稱首矣年十八歸國子監生同里汪君德渭相夫有禮處家以勤上承君姑內接同室汪固巨族食指數千每伏臘有辰或值宴喜堂寢左右列盈盈之百筵居鄰東西陳羹羹之束帛侍婢林立行僮候門姊指畫裕如應機俄頃伯姒歎其敏決媪嫗以爲神明于于焉肅肅焉豐約各適其宜者也姊事母孝一歲迎養常及十旬亮吉以貧故輟讀姊哀其志俾得卒業梁安

定之室樊嫗繫其輕重李伯度之學穆姜益其神智姊自處尤約曷
澣曷否服前時之嫁衣一餐再餐同守舍之薄餼然而釵之數質則
周六親之貧倉之屢匱以拯四舍之急蓋廓如也晏如也前後凡產
四男四女今惟一男四女在姊嘗謂亮吉曰吳下之俗出室之女資
千金而靡吝援經之男脯一束而殊慊予每病之是以多金延師先
日供具所以教者靡不兼至今子已授室幾有成立而姊遽以卒烏
乎哀哉歲在丙申遭吾母喪姊及第五人拊踊一室自是凡出處動
靜必咨姊後行姊哀其衷撫視尤摯逮亮吉舉順天鄉試姊貽書及
之勉以世德乃昭昭之言方鏤厥膺而冥冥之棺已闔厥視言旋言
歸靡復伯姊之問松耶柏耶遂拱女須之里烏乎哀哉姊生乾隆五
年十月二十日卒以今年五月二十五日年四十有一遂爲之誄曰
金瓠不存澤蘭永逝惟姊之孝申乎易世祁祁府君訓方惟義亦越
茲母柔規靡替有鶯其文有玉其質哦詩習算儒服是試歲之重光

云值閔凶予羽飄搖室遷于東婉孌諸姬耀羽綴玉姊居其間布裳
整肅鄰之不戒燼其東南赫兮沸湯伊誰克探一女之勇逾乎百男
惟茲諸姬自謂靡及厥聲英英中外咸集歲華方殷事此夫子伊惟
德門克匡厥事慈親之訓民生在勤惟姊承之富而能貧盤盤一編
朝夕靡替云茲衰祚以望予季疇昔蓬居凝沍之辰持編夜歸憶姊
候門入室爨冰束火不溫姊勸我讀達乎凌晨承師之資惟姊是恃
曾三十年靡慰厥志重泉既反見母有期云此弱弟行猶棲棲伯遵
乎西仲居于北言旋言歸靡有年載烏乎哀哉暉暉日月人祈其壽
我獨異斯曷云不驟晏晏室家人慶厥居我獨異斯入室而吁曾昭
昭之昔戒復沆沆之別淚星離離而幾易魂遙遙而莫逮昔昔之期
夢姊于庭若戒塗而南適勅予季其東征朝陳書而發冊懼宵兆之
不禎詎徂春而徂夏慟一死而一生烏乎哀哉父兮母兮惟姊從兮
曾是鮮民不克共兮欲報之德惟姊申兮曾是鮮民顏之覲兮情憧

憧而哭姊志惋惋而悼姑感衰宗于五載曾十輩而九殂維賈逵之
永歎服仲由之不除庶百年之倏忽永嘉覲于淵塗

晉太康三年地志王隱晉書地道記後敘

靈巖山館叢書大類有三小學家一地理家二諸子家三地理自山
海經至宋敏求長安志凡若干種先生以亮吉麤知湛濁稍別廣輪
每成志地之書輒預校讎之役閱逢執徐歲壯月所校太康志地道
志二卷刊成授簡賓筵命書後序謹按太康三年者晉平吳後第二
年也日南之地甫入輿圖建業之宮裁爲郡治于是潘岳著關中之
記摯虞成畿服之經王範上交廣之書徐氏作都城之錄唐李善注
文選稱太康地志曰都盧國其人善緣高是知州郡之外又志八荒
風土之餘兼詳異俗拓地萬里成于二紀劉石未興揚益旣滅令甲
之所載典午之最盛云厥後賈耽之述四夷樂史之詳百國蓋灌輿
于此與王隱以作史之才著承家之美時則五馬渡江纔逾二主羣